

von Wulf Wager

Wassera'schlag



Mei Nochbr, dr gertaschlanke ondrdrückte Ma von meira propera 150-Kilo-Prachtsnochbere hat neilich Gallastoi ghet ond weil sei Doktr net so sicher war, hot der ihn en d' Röhre gschickt. So a CT isch wia lebendig begraba, bloß lauter. Dia Ondrsuchung isch nix für klausrophobische Menscha. Mei Nochber hot's guat ausgehalten, weil er sich vorgstellt hot,

dass er auf ra grüna Wiese liegt. Aber sei Weib, mei propere Nochbere, hätt mr en dia Röhre garnet nei brocht. Noch dr Ondrsuchung hend se no gschwend dia CD mit dene Salamischeibaaufnahme von dem seira Gallablos beim Dokter abgeba. Aber er hot a bissle warta miassa ond währenddessa hot sei Frau, die dackelhaft mitta uf dr Stroß parkt hot, femfmol wegfahra miassa. No hot se aus em Auto rausbefzt, wann er denn endlich komma dät. Aber der arme Kerle hot jo au nix drfier kenna. Schließlich isch'r zu ihra en's Auto gssa. Aber dui war grätig wia a aldr Stoibutt.

Mei Nochbr hot miassa nüchtern, also ohne Essa ond trenka zu der Ondrsuchung komma. Dementsprechend hot'r Durscht geht. Mei Nochbere hot aber bloß a klois Auto, ond 's Wetter war guat, also hot 'r beim Trenka aus derra anderhalb-Liter-Flasch dui Flasch zom Fenschter rausgehbt. En dem Moment hot mei grätige Nochbere d' Scheib elektrisch Nufflassa, sodass die Flasch eiklemmt worda isch ond meim Nochbr gefühlte 1,5 Liter en ra Druckbetankung d' Gurgel na ischt. Ogfähr en halber Liter hot sich no ibr seine Kloider ond em Auto vrdoilt. Er isch z' tot vrschrocka, aber sei Weib hot en glei no grätiger abäfzt, ob er no ganz bacha sei, do hanna so a Sauerei zom vera'stalta. Drweil hot der arme Kerle garnix drfier kenna. Koi Wonder, dass der Gallastoi hot. Mir wär do d' Galle scho lang iibrkocht.

Bis näggschd Woch

Ihr

Alle Kolumna zom Nochlesan
ondr www.woascht.de
odr em Facebook em
WulfWager Fanclub